


REPUBLIQUE DU BURUNDI



IBIRO VYAMUKURU W'IGIHUGU

IJAMBO NYENICUBAHIRO

PTERO NKURUNZIZA

UMUKURU W'IGIHUGU ASHIKIRIJE ABARUNDI

ABIPFURIZA UMWAKA MUSHASHA W' I 2011

BURUNDI, REPUBLIQUE, UNION DÉMOCRATIQUE, PROGRESSISTE, SOCIALISTE

**Barundi, Barundikazi,  
Ncuti z'Uburundi,**

1. Muri iki kiringo turiko turasozera umwaka w'2010, twigina kandi umwaka mushasha w'2011, turakengurukiye cane Imana Rugiravyose yo yatuzigamye, ikaduha amagara n'umutima vyo kurangura ibikorwa vyiza biduteza imbere, bigateza imbere n'ighugu cacu. Nihabwe icubahiro kiyibereye.
2. Turipfurije abarundi mwese n'ababa mu Burundi umwaka mushasha mwiza, umwaka w'amahoro n'imigisha myinshi mu miryango yanyu, mu babanyi no mu bagenzi.
3. Icivugo c'uno mwaka ni : « **Duhindure ingendo ku kazi no mu miryango yacu, turwanye ba kaboko n'abarya ibiturire, ni yo nzira irashe idushikana kw'iterambere rirama** ».

**Barundi, Barundikazi,  
Ncuti z'Uburundi,**

4. Twarabashikirije ivyo tuzokwitwararika kurangura muri iyi myaka itanu mwadutoreye, navyo bikaba biri muri izi ngingo nkuru nkuru zikurikira :
  - 1° Gutsimbataza amahoro n'umutekano no kunywanisha abarundi kuko ari ryo shingiro rya vyose.
  - 2° Gutsimbataza intwaro ibereye mu kurwanya twihanukiriye ingeso mbi zose zituma ubutunzi bw'ighugu bubangamirwa : ibiturire, kudakora akazi amasaha yose kagenewe, guhemba abatakoze, gukoresha nabi ibikoresho vy'akazi nk'iterefone, imodoka, ibitoro, imashini, impapuro, kutabungabunga amazu n'imitahe vya Leta, amazi n'amatara.... aho vyigaragaza mbere ko izi ngeso zihombesha cane Leta nk'ibiturire.

- 3° Tuzokwitaho ibikorwa nyamukuru vy'iterambere mu bisata biraba cane cane inyubako nk'amabarabara n'amazu ya Leta, uburimyi n'ubworozi, umuyagankuba, ubuhinga bwa none bwo gutumatumanaako amakuru, igisata c'ubutare, tutibagiye kubandanya duteza imbere ibijanye n'indero n'amagara y'abantu.
5. Mw'ijambo ry'uno musi urangiza umwaka w'2010, tuza guca ku mayange ivyaranguwe muri uyu mwaka turangije, hamwe na bikuru bikuru tugiye kurangura umwaka w'2011. Ido n'ido mukazobishikirizwa n'abashikiranganji, umwe wese mu gisata ajejwe.
  6. Uwu mwaka dusozereye waranzwe n'ikiringo gihambaye c'amatora. Turakeje abarundi kuko barerekanye ko bamaze gutera intambwe mu vy'intwaro ya demokarasi. Twibuke twese ko ari ubwa mbere mu Burundi haba amatora yo gusubiriza inzego zarangije ikiringo zatorewe n'abanyagihugu.
  7. Amatora yagenze neza rero kuko cane cane Leta yabandanije icungera umutekano w'abanyagihugu, gurtyo abenegihugu bakitaba mu mahoro n'umutekano ibikorwa vyose bijanye n'amatora ata wandya wangura. Turakeje rero bimwe bivuye ku mutima inzego zziejwe umutekano kuba zariyambitse umutamana mu guhinyuza abazikengera, bavuga ngo ico gikorwa ntaco zoshoboye.
  8. Twaritayeho rero gutsimbataza umutekano mu gihugu, inzego zibijejwe ziratuza ku rugero rushimishije uturwi tw'abasuma n'abicanyi twagomba kwigira ndanse haba imbere y'amatora, mu matora n'inyuma y'amatora. Izo nzego zarerekanye ko rutitaha, nizikomere ku muheto turazishigikiye, kandi zamize ku muzirkanyi ko ari igikorwa ca misi yose.
  9. Turabasavye ngo bakomeze uko gukorana kwaranze abanyagihugu, abajejwe umutekano, abajejwe intwaro n'abajejwe ubutungane, dusaba n'abatowe nabo ngo biyongere kuri urwo runani.

10. Turasavye rero ko ya makomite y'umutekano yobandanya koko akora ; abarongoye imitumba bagakurikirana neza uruja n'uruza rw'abo barongoye n'ababagendera, kugira ngo bamenye vuba inkozi z'ikibi, babimenyeshe abajejwe intwaro n'abajejwe umutekano.  
 Ni co gituma tuzokwitaho kworohereza abarongoye imitumba mu bijanye no gutumatumanaako amakuru, bivanye n'uburyo tuzoza turaronka, tukanabandanya gukura ibirwanisho mu banyagihugu.
11. Tuzokomeza imigenderanire myiza Uburundi bufitaniye n'amakungu. Nkako, nta gihugu na kimwe dufitaniye ingorane, vyaba ivyo duhana imbibe canke ivya kure, mbere tugashima n'uko Uburundi buherutse kwizigirwa ngo burongore Ishirahamwe ry'ibihugu vyo muri Afrika y'ubuseruko.
12. Tuzobandanya kandi umugambi wo gufasha ibindi bihugu mu kurungika ingabo zo guhagararira amahoro n'umutekano nkuko turiko turabikora muri Sudani, Somaliya, Côte d'Ivoire, Centre Afrika na Haïti.
13. Dusavye rero indongozi muri izo nzego kubandanya gukomeza discipline mu guhana ata kinya, no kwirukana birimwo, uwo wese yoba afise ingeso yo gutitura akaranga n'akarangamutima kazo.
14. Umutekano uzotsimbatazwa kandi ari uko ubutungane bukoze neza. Turashima ingendo nshasha yo kudatevy a manza cane cane kubafatanywe itonga (procédure de flagrance) n'iyo kwama hagegekanijwe umushikirizamanza mu masaha n'imisi bitari ivy'akazi, nakare inkozi z'ikibi ntiziraba umusi n'isaha.
15. Turasavye kandi abakora mu butungane, aba OPJ n'abacunga amabohoero ngo bigengesere, kugira ntihagire inkozi z'ikibi zirekurwa zidahanywe canke bidakurikije amategeko, kuko bizana umutekano muke kandi bigatuma abanyagihugu bagira ingeso mbi twiyamiriza yo kwihanira.

16. Gutsimbatara kw'amahoro n'umutekano ni kwo kwatumye benewacu bari barahungiye hanze y'igihugu bahunguka, eka n'abahungiye hagati mu gihugu bagasubira mu vyabo.
17. Leta izobandanya yakira abahunguka, itegekanye n'uburyo bwo kubakira neza nko mu kwubakira ibirwati vy'amahoro abahungutse badafise canke batazi aho bashikira. Irasaba kandi abasangwa kubandanya barangwa na wa mutima w'urukundo berekanye mu kwakira benewabo bahungutse, naho bitama biborohera kubera ingorane zamatongo.
18. Turashima igikorwa c'umurwi ujejwe gutatura amatati yamatongo n'ayandi matungo washoboye gutunganiriza abari bawituye, mu gutorera inyishu amatati arenga ibihumbi bitatu (3.000).

Abahungutse rero baronkejwe amatongo mu mategeko bakaba bariko bararonka impapuro zemeza ko abegukiye burundu bo n'uruvyaro rwabo, nayo raporo y'uwo murwi ku matongo ya Leta yihagiwe n'abantu, ikazokorerwako n'ubushikiranji bubijewe, kugira asubire mu minwe ya Leta, ashobore kugira ico akoreshejwe ku neza y'abanyagihugu bose.

Leta ifise umugambi wo kuronsa umunyagihugu wese afise itongo yaronse mu kuri impapuro zivyemeza.

**Barundi, Barundikazi,  
Ncuti z'Uburundi,**

19. Havuzwe vyinshi inyuma y'amatora, ariko turashima abarundi, kuko batakijana nyabahururu.
20. Nkuko vyama bigenda rero, inyuma y'amatora twarashizeho nzego nshasha, tugena abazigize twisunze amategeko kandi atawe twinuvye kubera umugambwe avamwo. Ubu tukaba turiko turasubiramwo amategeko atunganya ubushikiranji bumwe bumwe, kugira ngo imigambi twemereye abarundi ishobore kuranguka neza.

21. Twarashizeho umuhuza wa Leta n'abanyagihugu dukwirikije amategeko, igikorwa ciwe kikaba kirindiranywe igishika.
22. Amategeko agenga umurwi w'igihugu ujejwe ivy'agateka ka zina muntu yarizwe mu nama nshingamateka na nkenguzamateka.
23. Umurwi nyabutatu-ndongozi wagiranye ibiganiro n'abaserukira abanyagihugu bijanye n'ugushiraho ubutungane bunyanisha bw'inyuma y'intamabara warashikiriye raporo yawo.
24. Tugiye kwihweza neza ivyo abanyagihugu bashikiriye, tunganire n'abo vyega, dushinge ikirangamisi c'ingene inzego z'ubutungane nk'ubwo zojaho mu kiringo kibereye, kugira ngo zigirire akamaro abarundi bo nyene uwababo mu kubanywanisha no mu gusubiza hamwe, vyose bikazokorwana umutima wo gukunda igihugu no gutsimbataza amahoro n'umutekano.
25. Leta turongoye, ifashijwe n'ishirahamwe mpuzamakungu ONU, yarakoresheje ibiganiro biha ijambo abanyagihugu, bakavuga uko bipfuza ko igihugu corongorwa.  
Aho ni naho abanyepolitike bumvikana gushiraho urwego ruhoraho rwohuriramwo imigambwe yose.
26. Kugira rero imigambwe, yaba iyatsinze amatora canke itaronse ayo mahirwe yo kwizigirwa n'abanegihugu ku rugero yipfuza ibandanye igira ukwo iterera iviyumviro, tuzokomeza urwo rwego imigambwe yishiriye, dutunganye itegeko rigenga imigambwe itavuga rumwe na Leta, twongere dutunganye itegeko ryo gutegekanya amafaranga yo gufasha imigambwe kurangura ibikorwa bimwe bimwe vya misi yose.
27. Ibi vyose tubikora mu ntumbero yo guha ijambo n'umwidegemvyo uwo wese ashaka kugira iciyumviro aterereye mu kwubaka igihugu cacu no mu gutsimbataza demokarasi ishingiye ku guhana ijambo, kuja inama n'ingingo, ariko twubahiriza ingendo yo gusonera ico abenegihugu bashinze biciye mu matora.  
Ni co gituma ibiganiro vyo kutudehesha canke vyo kwaka ubutegetsi abenegihugu tutazobiha ikibanza.

**Barundi, Barundikazi,  
Ncuti z'Uburndi,**

28. Mu gisata c'indero, tuzobandanya wa mugambi nyamukuru wo kurwiza amashure abanyagihugu biyubakira mu bikorwa rusangi, turondere n'ibikoresho vya nkenerwa. Abana bo mu mashure y'intango bazobandanya biga ku buntu.
29. Tuzobandanya kwitegurira gutanguza umugambi wo kubandanya inyigisho mu mashure y'intango gushika mu mwaka w'icenda, kugira ngo abana badashoboye kubandanya amashure asanzwe babe bafise imyaka ikwiye yo guca biga amashure aciriye hagufi y'imyuga, aya nayo tukazoyerwiza mu gihugu.
30. Turiko turongereza abigisha mu guha akazi abarimu **3.500** mu mashure y'intango, **1.500** mu mashure yisumbuye n'abakwirikirana indero bashika hafi **1.400**.
31. Nayo za Kaminuza, tuzogenzura ko izigenga n'iza Leta zikwije ivyangombwa, nk'inyubakwa nziza, urutonde rw'ivyirwa, ibikoresho n'abigisha bafise ubushobozi bukwiye.
32. Mu gisata c'amagara y'abantu, naho nyene tuzobandanya umugambi twatanguye wo kuvura ku buntu abana bari munsi y'imyaka itanu, abavyeyi bibungenze n'abibarukira mu bitaro no mu mavuriro ya Leta, dutange imiti y'intango mu kuvura maraliya.
33. Muri ico gisata, tuzoha akazi abakozi **644** bagizwe n'abaganga **44** n'abafasha babo bashika **600**.
34. Tuzokwubaka ibitaro vy'akarorero i Karusi, n'i Gitega, twubake canke twagure ibitaro n'amavuriro bitari bike, tubihe n'ibikoresho.
35. Tuzokwitaho cane uyu mwaka ibikorwa vyotuma abanyagihugu bagira amagara meza mu kwikingira indwara. Ivyo tuzobicisha mu migambi nyamukuru ikurikira :

- **Ubwa mbere** : Tuzobandanya gukwiragiza amazi meza mu gihugu duciye cane cane mu bikorwa rusangi mu kwubaka za rusengo. Nkako, umugambi wo kwubaka rusengo **25 mw'ikomine yose** urabandanya, ahenshi mbere bakaba bariko barawusozeria.
- **Ubwa kabiri** : Tugiye gutanguza wa mugambi wo gukwiragiza ibigwati. Ikgwati kizojamwo hagati y'ingo **300 n' 500**, bubakishe amatafari natwe tubahe amabati ku buntu. Bizotuma vyoroha rero no kuhashikana amazi, amatara, amasoko, amashure n'amavuriro, isuku rigwire, kuko ntawuzorarana n'ibitungwa canke ngo acane mu nzu yo kuraramwo, kandi tuzoba dutanguye umugambi uhambaye wo kurwanya nyakatsi.

Turibukije ko uwuzokwubakisha amatafari ahiye azoronswa amabati n'umuyagankuba uvuye ku zuba. Inzu zizokwubakwa na benezo ku rupimo n'integuro tuzotanga.

Ibigwati bizotuma igikorwa co kubungabunga umutekano coroha, vyongereze iterambere mu miryango, haguke isindimwa na burya hari aho yari ikwiragiyemwo amazu.

- **Ubwa gatatu** : Tuzohimiriza cane abanyagihugu bitabe umugambi wo gucandagisha abana no kubaha imiti y'inzoka kugira ngo bakingirwe.
- **Ubwa kane** : Tuzobandanya gukurikira ku buntu abapfasoni bibungenze ku ngwara zose zijanye no gusama inda, gurtyo baze bibaruke abakomeye.
- **Ubwa gatanu** : Tuzobandanya gutanga imisegetera irimwo umuti wica imibu mu ntara **8** zari zisigaye.

36. Tuzobandanya kuwijura abantu ngo bikingire kwandura umugera wa sida, twongere tubandanye dutanga ya miti yo gupfupfahaza ku bamaze kwandura, dutange imiti ivura indwara z'ivyuririzi, dokomeze wa mugambi wo gukingira abana bakiri mu nda ku bavyeyi bafise umugera wa sida.

37. Mu kworohereza abakuze kwivuza, tubaye turongereza uburyo kugira ngo ka gakarata ko kwivurizako mu bitaro gashikirwe na benshi. Ariko muri uyu mwaka tuzokora ivyirwa bitomoye kugira ako gakarata gashobore gushikirwa na bose, gakorere no mu mavuriro.
38. Haba rero mu gisata c'ubutungane, c'indero n'ic'amagara y'abantu, harategekanijwe kwongereza abakozi. Ariko, kubera vyagaragaye ko hariho uturere cane cane ibisagara turimwo abacamanza, abanditsi b'imanza, abigisha n'abaforoma barenze igitigiri gitegekanijwe hari ahandi habuze, hafashwe ingingo nyamukuru zibiri :
- Kudasubira gukura abakozi mwene abo mu gihugu hagati babazana mu bisagara ( mutation ).
  - Kuvana bamwe mu bakozzi aho ari benshi babarungike mu ntara hagati, ahari abadakwiye.

**Barundi, Barundikazi,  
Ncuti z'Uburundi,**

39. Kurwanya inzara aha iwacu bica cane cane mu guteza imbere igisata c'uburimyi n'ubworozzi gitunze abarundi barenga **90%**. Ni co gituma uno mwaka Leta yongereje uburyo muri ico gisata, kuva kuri **3%** gushika kw'i **11%** ku mafaranga izokoresha, tudashizemwo amafaranga aja muri ico gisata ava hanze. Ibiterwa bizoshirwa imbere y'ibindi navyo ni **umuceri, igitoke, ibiraya, umwumbati n'ikigori**. Ariko rero n'ibindi biterwa ntibizoba vyibagiwe, kuko naho twokwimbura ivyo, dukenera n'ibindi bijana kugira ngo dufungure neza.
40. Leta yaramaze mbere gufata ingingo yo kugabanura igiciro c'umwavu w'ikizungu.
41. Kubera umwimbu uzoba witezwe uzoba ari mwinshi, hazokorwa ubushakashatsi bujanye n'ubuhinga bwo kuziganya, guhingura no kudandaza ivyo twimbura.

42. Mu guteza imbere ico gisata nyene, ubushakashatsi buzoshigikirwa cane, twige ingene twovomera ibiterwa mu ntara zo mu Kumoso, Bugeserera n'Imbo.  
Twarategekanije kandi kugarukira ubworozi.
43. Abarongoye abandi basabwe kwijukira uburimyi n'ubworozi bwa kijambere kugira babere akarorero abanyagihugu.  
Dusavye incabwenge kuja mu mashirahamwe y'abanyagihugu kugira mubafashe gutunganya imigambi.

**Barundi, Barundikazi,  
Neuti z'Uburundi,**

44. Muri uyu mwaka, Leta izokwitaho bidasanze ikibazo c'irwirirana ry'abantu. Abahinga bavuga ko abantu biyongera ku rugero rwa 2.4% ku mwaka mu Burundi, ariko ubutunzi nabwo budakwirikira. Urwaruka narwo ruri munsi y'imyaka 15 rurenga 45% vy'abarundi bose, urwo narwo rukaba rukeneye kubaho neza ubu no muri kazoza.
45. Ntitwiyobagize na rimwe indyane zituruka ku matongo mu Burundi, aho zisigaye ziri mu bitera umutekano muke mu gihugu, no mu masentare hakaba hinganjeyo imanza mwen' izo.
46. Uko ibintu bimeze ubu, naho Leta yokwita ku rutare ngo abantu babeho neza, akazi kenshi kaboneke, icibonekeza ni uko ataco yoshikako gishemeye, umurindi wo kuvyara mu Burundi utagabanutse.
47. Muri uyu mwaka dutanguye, tuzogirisha amanama menshi abaserukira abandi, abatowe n'abandi, kugira ngo duhimirize abanyagihugu kukigira ikibazo cabo, nabo baterere umuti twofata.

Muri ivyo vyiyumviro ni ho tuzoca dukura politike ya Leta ijanye no gucungera ngo igwirirana ry'abantu ntirirengere ubutunzi igihugu gifise.

**Barundi, Barundikazi,  
Ncuti z'Uburundi,**

48. Dufitiye imigambi myinshi kandi myiza igihugu cacu. Ariko ntishobora kurangurwa ata muyagankuba ukwiye dufise. Ni co gituma muri uyu mwaka hazotanguzwa ibikorwa vyo kwubaka no gusanura ingomero nkuru n'ingomero ntonto hagati mu gihugu. Umuyagankuba uzobandanya gukwiragizwa muri karatiye nshasha mu gisagara ca Bujumbura, hatibagiwe no mu bisagara vyo hagati mu gihugu. Tuzokwiragiza n'umuyagankuba uvuye ku mishwarara y'izuba mu mashure yisumbuye y'amakomine n'amavuriro.
49. Mu gisata c'ubudandaji, umugambi wa Leta wo kworohereza abarwizatunga b'abarundi n'abanyamahanga uzobandanya kugira ngo bakore bunguka, ariko batazimba abaguzi. Hazoshirwa ahbona ingene amategeko yasohotse muri ico gisata mu mwaka turangije yorangurwa, kugira ngo abarwizatunga ntibajuragiriike.
50. Mu ntumbero yo kworohereza abadandaza n'abaguzi kugira uruja n'uruza hagati mu gihugu, Leta izobandanya wa mugambi yatanguye wo gukora no kubungabunga amabarabara yo mu bisagara n'ayahuza imirwa mikuru y'intara be n'ayahuza ibisagara bito bito vyo hagati mu gihugu.
51. Ibarabara (RN5) rihuza Nyamitanga na Ruhwa, ibarabara (RN15) rihuza Ngozi na Gitega, ibarabara (RN19) rihuza Cankuzo na Muyinga, ibarabara (RN9) rihuza Bubanza na Ndora, ayo yose azokorwa ashirwemwo na kaburimbo. Ibarabara (RN4) rihuza Bujumbura na Gatumba naryo rizosubirwamwo.
52. Ivyirwa vyo gukora ayandi mabarabara bizobandanya, twongere tubandanye turondera uburyo bwo gusubiramwo ayashaje no kwubaka mashasha. Amabarabara y'ivu n'amabarabara y'imigenderanire turonkeye uburyo nayo nyene azosanurwa aho bikenewe cane.

53. Ntituzosiga inyuma gukingira ibidukikije, mu gutera ibiti cane cane vy'ivyamwa no guca imikobeko ku misozi ihanamye. Tuzobandanya dukingira amashamba, duciye cane cane ku mashirahamwe y'abanyagihugu, nayo azoharonkera akarusho kaboneka.
54. Mu bikorwa vya Leta kandi, tuzokwubaka ingoro y'Umukuru w'igihugu mu gisagara ca Bujumbura, n'inyubakwa y'ubushikiranji bw'ubutunzi, tubandanye ibikorwa vyo gutegura ibindi bisagara vyo hagati mu gihugu, twongere tubandanye twiga politike nshasha y'uburaro bwiza duhereye muri komine Buyenzi. Hazokorwa n'ivyirwa bitegura kwubaka n'ibiro vy'ubundi bushikiranji, ikibuga c'indege ca Bugendana, amasentare, ibibuga bikuru bikuru nka stade...
55. Irangurwa ry'imigambi ya Leta risaba uburyo bwinshi. Turashima igikorwa ibiro OBR bimaze gushikako mu gutuma ku kwezi ku kwezi hari akarusho k'amafaranga yinjira mu kigega ca Leta. Ibi bikaba vyatumye abakozi bashobora guhembwa mu mezi aheza umwaka ata mfashanyo mvamakungu zari zemewe zishitse. Dusavye ko abanyagihugu cane cane abarwizatunga bosigurirwa uko OBR ikora.

**Barundi, Barundikazi,  
Ncuti z'Uburundi,**

56. Biragaragara ko iterambere mu butunzi no buryo bwo kubaho kwacu rikiri kure, turavye urugero rw'ubukene n'inzara vyugarije abarundi batari bake. Ni co gituma dutegerezwa kugira akigoro, tugahindura ingene tubayeho uno musi, kugira ngo ejo tuze tubebo neza kuruta.  
Dutegerezwa guhinduka kandi tugahindura n'ingendo, tugashira imbere umutima wo gukunda igihugu, kugikorera no kubungabunga ubutunzi bwaco.

57. Ntitwokwihebura, biriko biraza. Muri uyu mwaka 2010, Igipolosi na sentare bijejwe kurwanya ibiturire vyaragaruye, amafaranga y'amarundi angana hafi **imiliyaridi zitanu n'imiliyon 250 arasubira** mu kigega ca Leta, n'ayandi akaba aza arasubizwa n'abagiriwe n'ico caha.
58. Akamo twateye abarundi bose ngo bavire hasi rimwe barwanye ba kaboko n'ibiturire, twizeye ko kazotuma izo nzego zigarura ubutunzi bwasesaguwe canke bwanyurujwe n'abari bategerezwa kubukingira.  
Ni urugamba rw'abarundi twese, n'udushimwe twarategekanijwe ku bazoranga ahariko harabera ubwo busuma n'abariko barabukora.

**Barundi, Barundikazi,  
Ncuti z'Uburundi,**

59. Twagira tumenyeshe abarongoye abandi ku nzego zose ko hagiye kujaho urwego rwo gukomeza ibiganiro hagati ya Leta, abakozi n'abakoresha kugira ngo hame umwumvikano mu kazi, gurtyo, amayegereyegere agabanuke, binashobotse ahave. Dusavye umurongozi wese kugirana inama n'abo akoresha, ariko yirinde kwemera ubuki ategeka.
60. Dufatiye kw'itunganywa rishasha ryerekeye akarusho ku bakukuruke no kuri politike y'imishahara bigiye kujaho vuba, tuzoca dutanga akaryo ku guhanahana iviyumviro kuri ca kibazo c'ukugabanya ubusumbane bw'imishahara.
61. Imbere yo kurangiza twashaka gushimira amakungu n'uwo wese yagize ico aterera ngo Uburundi bwacu bube bufise isura nziza nk'iyi. Aha twovuga ibihugu n'amashirahamwe mpuzamakungu vyaterereye mw'iterambere ry'ighugu no mu gukurikirana amatora.
62. Twovuga kandi abakozi b'Imana bagumye ku mavi basengera igihugu, umurwi CENI watunganije amatora neza, abajejwe umutekano bafadikanije n'abajejwe ubutungane bakaburizamwo abagomba gutoba amatora, abamenyeshamakuru bagize urunani bakamenyesha ku mwanya ku mwanya uko ibintu vyaba biriko biragenda.

63. Turakengurukira cane abarundi bifashe rugabo muri ico gihe havugwa menshi, bakerekana ko baza bazi gutandukanya icatsi n'ururo.
64. Isango rero twahanye ni rya rindi, inyuma y 'amezi atandatu tuzotangura gufatira ingingo uwo ariwe wese twisunze ico yashinzwe n'ico yamariye Abarundi.
65. Nkako, nkuko twabisavye, umurongozi wese ategerezwa kugira integuro y'ivyo azorangura mu mwaka, bikaja mw'ihangiro ry'imyaka itanu canke irenga. Uko amezi atandatu rero aheze, tuzoraba intambwe agezeko mu gushira mu ngiro ikirangamisi c'intunganyabikorwa ciwe, bisigura ko umwe wese ategerezwa kwumva ko hari ico abazwa n'abamukurira, mbere n'abo akurira.
66. Ni co gituma, twihweje ko iyi myaka icumi iheze twashoboye gutsimbataza amahoro, umutekano na demokarasi tukagira igihugu gitekanye, twihaye ihangiro ko muri iyi myaka icumi tuzokora uko dushoboye kugira mu mwaka w'2020 Uburundi bube bwavuye ku rutonde rw'ibihugu bikenye. Turasavye Umurundi wese, aho ari hose, ngo adufashe nawe iri hangiro arigire rwiwe.
67. Turasubiye gutera akamo umunyagihugu wese ngo agire ihangiro ry'umwaka, imyaka itanu canke irenga mu bijanye n'iterambere yipfuza gushikako mu rugo canke mu muryango wiwe, canke mw'ishirahamwe arimwo.
68. Turangije dusubira kwipfuriza abarundi n'ababa mu Burundi umwaka mushasha mwiza, umwaka wo guhinduka no guhindura ingendo tugakorera koko igihugu cacu, gitere imbere natwe dutere imbere.  
**Duhindure ingendo ku kazi no mu miryango yacu, turwanye ba kaboko n'abarya ibiturire, ni yo nzira irashe idushikana kw'iterambere rirama ».**

**Imana ibahezagire,**

**Murakoze.**